

Ո Ր Ո Շ ՈՒ Մ թիվ- 1
Վարչական տույժ նշանակելու մասին

«08» հունվարի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Ալեքսանդր Մնացականի Եսայանի վերաբերյալ նյութերը.

Պ Ա Ր Զ Ե Ց Ի ՝

2020 թվականի սեպտեմբերի 28-ին ՀՀ ՊԵԿ Արարատյան մաքսատուն-վարչության աշխատակիցները «Ուրարտու Տերմինալ» ՍՊ ընկերության մաքսային հսկողության տարածքում զննման են ենթարկել «Սոնա Սաֆարյան» ԱԶ-ի անունով «Mercedes Benz» մակնիշի, «34LA222» պետհամարանիշի ավտոմեքենայով Վրաստանի Հանրապետությունից ՀՀ ներմուծված և թիվ 05100033/250920/0039177 տարանցման հայտարարագրով ձևակերպված շարժիչի յուղը: Զննման արդյունքում պարզվել է, որ Բագրատաշենի մաքսային-կետ բաժնում լրացված թիվ 5100033/267407/2020 բեռնագրի համաձայն՝ «Սոնա Սաֆարյան» ԱԶ-ի կողմից բեռի տեղափոխում իրականացրած «Mercedes Benz» մակնիշի 34LA222 համարանիշի ավտոմեքենան կշռել է 4180կգ (1620տ և 2560տ), իսկ «Ուրարտու Տերմինալ» ՍՊԸ մաքսային պահեստում լրացված թիվ 441 և 468 բեռնագրերի տվյալների համաձայն՝ բեռի քաշը կազմել է 3360 կգ, որից ավտոմեքենայի դատարկ քաշը կազմել է 2080կգ, իսկ ապրանքի փաստացի քաշը՝ 1280կգ:

Փաստի կապակցությամբ ավտոմեքենայի վարորդ Ալեքսանդր Եսայանի նկատմամբ ՀՀ մաքսային օրենսգրքի 197-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն՝ մաքսային հսկողության ներքո գտնվող ապրանքը, առանց մաքսային մարմնի թույլտվության բեռնաթափելու համար:

09.10.2020 թվականի ՀՀ ՊԵԿ իրավաբանական վարչության պետի թիվ 247 որոշման համաձայն՝ Ալեքսանդր Եսայանը ճանաչվել է զանցառու ՀՀ մաքսային օրենսգրքի 197-րդ հոդվածով նախատեսված մաքսային կանոնների խախտման համար և նրա նկատմամբ նշանակվել է տուգանք առանց թույլտվության բեռնաթափված 820կգ ավտոմեքենայի յուղի մաքսային արժեքի 50 տոկոսի չափով՝ 1.114.180 ՀՀ դրամի չափով:

2020 թվականի հոկտեմբերի 16-ի թիվ Ն/11-3/166934-2020 գրությամբ հարցում է կատարվել ՀՀ ՊԵԿ մաքսանենգության դեմ պայքարի վարչություն՝ խնդրելով միջոցներ ձեռնարկել Ալեքսանդր Մնացականի Եսայանի կողմից, մինչև «Ուրարտու Տերմինալ» ՍՊ ընկերության մաքսային հսկողության տարածք մուտք գործելը, «Mercedes Benz» մակնիշի, «34LA222» պետհամարանիշի ավտոմեքենայով ՀՀ ներմուծված և մաքսային հսկողության ներքո գտնվող, առանց մաքսային մարմնի թույլտվության բեռնաթափված յուղը մաքսային հսկողության տարածք բերելու ուղղությամբ:

22.10.2020թ. թիվ Ն/15-1/170762-2020 պատասխան գրության համաձայն՝ ձեռնարկված միջոցների արդյունքում հնարավոր չի եղել հայտնաբերել Ալեքսանդր Մնացականի Եսայանի կողմից ՀՀ ներմուծված և մաքսային հսկողության ներքո գտնվող առանց մաքսային մարմնի թույլտվության բեռնաթափված յուղը: Փաստի կապակցությամբ 23.10.2020 թվականին Ալեքսանդր Եսայանի նկատմամբ ՀՀ մաքսային օրենսգրքի 198-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

09.11.2020թ. Ա. Եսայանը բողոքարկել է թիվ 247 վարչական ակտը: Բողոքի հիմքում դրվել է ՀՀ ՊԵԿ Արևելյան մաքսատուն-վարչության Բագրատաշեն մաքսային-կետ բաժնի և «Ուրարտու Տերմինալ» ՍՊ ընկերության մաքսային պահեստի կշեռքների միջև առկա «անհամապատասխանությունը»:

ՀՀ ՊԵԿ նախագահի տեղակալի 2020 թվականի դեկտեմբերի 9-ին կայացված «Վարչական պատասխանատվության ենթարկելու մասին որոշմամբ սահմանված տուգանքի չափը փոփոխելու մասին» որոշմամբ Ալեքսանդր Եսայանի բողոքը մասնակի բավարարվել է և տուգանքի չափը փոփոխվել է՝ սահմանելով 725,439 ՀՀ դրամ: Բողոքի քննության ժամանակ իրականացված գործողությունների արդյունքում պարզվել է, որ բեռնաթափված յուղի իրական քաշը կազմել է 534 կգ:

ԵԱՏՄ մաքսային օրենսգրքի 14-րդ հոդվածի 1-ին կետի և 7-րդ կետի 7-րդ ենթակետի համաձայն՝ Միության մաքսային տարածք ներմուծվող ապրանքները Միության մաքսային սահմանը հատելու պահից գտնվում են մաքսային հսկողության տակ: Սույն հոդվածի 1-ին և 3-րդ կետերում նշված, ինչպես նաև սույն հոդվածի 4-րդ կետում նշված ապրանքները, որոնք չեն ճանաչվել որպես Միության ապրանքներ՝ սույն Օրենսգրքի 210-րդ և 218-րդ հոդվածներին համապատասխան, գտնվում են մաքսային հսկողության տակ մինչև հետևյալ հանգամանքների ի հայտ գալը՝ «մաքսային տարանջում» մաքսային ընթացակարգի գործողության ավարտը՝ կապված Միության անդամներ չհանդիսացող պետությունների տարածքով տեղափոխվող Միության ապրանքների հետ:

Համաձայն «Մաքսային կարգավորման մասին» ՀՀ օրենքի 128-րդ հոդվածի՝ արգելվում է մաքսային հսկողության ներքո գտնվող ապրանքներն ու տրանսպորտային միջոցներն առանց մաքսային մարմնի թույլտվության մասնակի կամ ամբողջությամբ հանձնելը, օտարելը կամ ոչնչացնելը, ինչպես նաև ապրանքների և տրանսպորտային միջոցների բեռնումը, բեռնաթափումը, փոխաբեռնումը, փաթեթների վնասվածքների վերացումը, փաթեթների բացումը, փաթեթավորումը, վերափաթեթավորումը կամ այդ ապրանքների կամ դրանց ուղեկցող փաթեթների վրա դրված մաքսային ապահովման միջոցները փոխելը: Նշված ապրանքները և տրանսպորտային միջոցները կորցնելու դեպքում անձը կրում է օրենքով սահմանված պատասխանատվություն:

«Մաքսային կարգավորման» մասին ՀՀ օրենքի 123-րդ հոդվածի 1-ին պարբերության համաձայն՝ Հայաստանի Հանրապետության սահմանով տեղափոխվող ապրանքներն ու տրանսպորտային միջոցները, ըստ մաքսային ընթացակարգերի, գտնվում են մաքսային հսկողության տակ: Նույն հոդվածի 2-րդ պարբերության համաձայն՝ անկախ սույն հոդվածի առաջին պարբերությամբ սահմանված հսկողության ժամկետներից, ներմուծվող ապրանքները Հայաստանի Հանրապետության տարածք ներմուծման պահից մինչև որևէ մաքսային ընթացակարգով հայտարարագրվելը գտնվում են մաքսային հսկողության տակ:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 198-րդ հոդվածը սահմանում է՝ մաքսային հսկողության ներքո գտնվող ապրանքներն ու տրանսպորտային միջոցներն առանց մաքսային մարմնի թույլտվության մասնակի կամ ամբողջությամբ հանձնելը, օտարելը, ոչնչացնելը կամ կորցնելը՝ առաջացնում է

տուգանքի նշանակում՝ այդ ապրանքների և տրանսպորտային միջոցների մաքսային արժեքի հիսուն տոկոսի չափով:

Ալեքսանդր Եսայանը 22.12.2020 թվականին հրավիրվել է ՀՀ ՊԵԿ իրավաբանական վարչություն գործի քննությանը մասնակցելու համար, սակայն վերջինիս միջնորդությամբ գործի քննությունը հետաձգվել է 30.12.2020 թվականին: Վերջինս 2020 թվականի դեկտեմբերի 30-ին մասնակցել է իր նկատմամբ սկսված մաքսային կանոնների խախտման վերաբերյալ գործի քննությանը և միջնորդել է գործի քննությունը կրկին հետաձգել և նշանակել 08"01"2021 թվականին:

Ալեքսանդր Մնացականի Եսայանը 2021 թվականի հունվարի 8-ին հրավիրվել է ՀՀ ՊԵԿ իրավաբանական վարչություն, իր նկատմամբ սկսված մաքսային կանոնների խախտման վերաբերյալ գործի քննությանը մասնակցելու համար և միաժամանակ նախազգուշացվել, որ ՀՀ մաքսային օրենսգրքի 219-րդ հոդվածի համաձայն՝ չներկայանալու դեպքում մաքսային կանոնների խախտման վերաբերյալ գործի քննությունը կիրականացվի առանց իր մասնակցության, սակայն վերջինս չի մասնակցել:

Այսպիսով, գործի նյութերով պարզվել է, որ Ալեքսանդր Մնացականի Եսայանը «Սոնա Սաֆարյան» ԱԶ-ի անվամբ ՀՀ ներմուծված և մաքսային հսկողության ներքո գտնվող 534 կգ քաշով 1,450,848 մաքսային արժեքով առանց մաքսային մարմնի թույլտվության բեռնաթափված յուղը հանձնել է այլ անձի, այսինքն՝ Ալեքսանդր Եսայանը թույլ է տվել ՀՀ մաքսային օրենսգրքի 198-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, թիվ 05100033/250920/0039177 տարանցման հայտարարագրով, ՄԴՊՎ 22.10.2020թ. թիվ Ն/15-1/170762-2020 գրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 198-րդ հոդվածով, 206 և 221-րդ հոդվածներով,

Ո Ր Ո Շ Ե Ց Ի՝

1. Ալեքսանդր Մնացականի Եսայանին (նույնականացման քարտի համար՝ 737176244) ճանաչել զանցառու ՀՀ մաքսային օրենսգրքի 198-րդ հոդվածով և նրան տուգանել շարժիչի յուղի մաքսային արժեքի հիսուն տոկոսի չափով՝ 725439 դրամ: /900005024055 (կող-19) հաշվեհամարին/

2. Որոշման մասին հայտնել Ալեքսանդր Եսայանին՝ պարզաբանելով, որ այն կայացնելուց հետո 10 օրվա ընթացքում կարող է բողոքարկել վերադաս մաքսային մարմին (ՀՀ ՄՕ 222-րդ հոդվածի 2-րդ մաս) կամ ՀՀ Վարչական դատարան երկու ամսվա ընթացքում (ՀՀ Վարչական դատավարության օրենսգրքի 72-րդ հոդվածի 1-ին մասին 1-ին կետ):

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ